

রেজিস্টার্ড নং ডি এ-১

বাংলাদেশ



গেজেট

অতিরিক্ত সংখ্যা
কর্তৃপক্ষ কর্তৃক প্রকাশিত

রবিবার, ফেব্রুয়ারি ৭, ২০১৬

গণপ্রজাতন্ত্রী বাংলাদেশ সরকার
পানি সম্পদ মন্ত্রণালয়

প্রজ্ঞাপন

তারিখ: ৩০ পৌষ ১৪২২ বঙ্গাব্দ/১৩ জানুয়ারি ২০১৬ খ্রিস্টাব্দ

নং ৪২.০৩১.০২২.০০.০০.০২৫.২০১৫-২৭।—দেশের সকল জলাভূমির অফুরন্ত প্রাকৃতিক সম্পদের সমন্বিত উন্নয়ন ও সুষ্ঠু ব্যবস্থাপনার লক্ষ্যে এবং ৩ অগ্রহায়ণ, ১৪২১ বঙ্গাব্দ মোতাবেক ১৭ নভেম্বর, ২০১৪ খ্রিস্টাব্দ তারিখে অনুষ্ঠিত মন্ত্রিসভা বৈঠকের ৮.৩ নং সিদ্ধান্ত বাস্তবায়নকল্পে 'বাংলাদেশ হাওর ও জলাভূমি উন্নয়ন বোর্ড' গঠন সংক্রান্ত ২৭ ভাদ্র, ১৪০৭ বঙ্গাব্দ মোতাবেক ১১ সেপ্টেম্বর, ২০০০ তারিখে পাসম-উঃঃ/বিবিধ-১৯/২০০০/৩৮৩-নং স্মারকমূলে জারিকৃত রিজিলিউশন বাতিলক্রমে জনপ্রশাসন মন্ত্রণালয়ের ২৯ নভেম্বর ২০১৫ তারিখের ০৫.১৫৭.০২৮.০৩.০২.০১১.২০১০-২৮৪ সংখ্যক স্মারক ও অর্থ বিভাগ, অর্থ মন্ত্রণালয়ের ০৫ জানুয়ারি ২০১৬ তারিখের ০৭.১৫৩.০২৯.০৬.০০.০১.২০১৫-০৩ সংখ্যক স্মারকের সম্মতিক্রমে 'বাংলাদেশ হাওর ও জলাভূমি উন্নয়ন অধিদপ্তর' প্রতিষ্ঠার লক্ষ্যে সরকার নিম্নরূপ প্রজ্ঞাপন জারি করিল, যথাঃ—

১। সংক্ষিপ্ত শিরোনাম।—ইহা 'বাংলাদেশ হাওর ও জলাভূমি উন্নয়ন অধিদপ্তর' প্রতিষ্ঠা সংক্রান্ত প্রজ্ঞাপন নামে অভিহিত হইবে।

২। সংজ্ঞা।—বিষয় বা প্রসঙ্গের পরিপন্থি কোন কিছু না থাকিলে এই প্রজ্ঞাপনে—

(ক) “অধিদপ্তর” অর্থ বাংলাদেশ হাওর ও জলাভূমি উন্নয়ন অধিদপ্তর;

(খ) “উপদেষ্টা পরিষদ” অর্থ বিধি ৭ এর অধীন গঠিত উপদেষ্টা পরিষদ;

(গ) “চেয়ারপারসন” অর্থ উপদেষ্টা পরিষদের চেয়ারপারসন;

(ঘ) “সদস্য” অর্থ উপদেষ্টা পরিষদের সদস্য;

(ঙ) “সদস্য-সচিব” অর্থ উপদেষ্টা পরিষদের সদস্য-সচিব;

(১০৭৩)

মূল্য ৪ টাকা ৮.০০

- (চ) “হাওর” অর্থ দুইটি ভিন্ন নদীর মধ্যস্থলে প্রাকৃতিকভাবে সৃষ্ট কড়াই আকৃতির বৃহদাকার কোন নিম্নভূমি;
- (ছ) “বাঁওড়” অর্থ নদী যখন তার গতিপথ পরিবর্তন করিয়া অন্য দিকে প্রবাহিত হয় তখন ফেলে যাওয়া জলাশয় এমন খুরাকৃতির কোন হ্রদ যাহার জলস্রোত সময়ের বিবর্তনে ধীরে ধীরে স্তিমিত হইয়া পড়িয়াছে;
- (জ) “জলাভূমি” অর্থ এমন কোন ভূমি যেখানে পানির উপরিতল ভূমিতলের সমান বা কাছাকাছি থাকে বা যাহা, সময়ে সময়ে, স্বল্প গভীরতায় নিমজ্জিত থাকে এবং যেখানে সাধারণত ভিজা মাটিতে জন্মায় এবং টিকিয়া থাকে এমন উদ্ভিদাদি জন্মায়;
- (ঝ) “বিল” অর্থ প্রাকৃতিক নীচু জায়গা বা বৃত্তাকার এলাকা যাহা বৃষ্টিপাত বা নদীর পানির দ্বারা প্লাবিত হয় এবং যাহা সমগ্র বৎসর পানিতে নিমজ্জিত থাকে বা বৎসরের আংশিক সময় আংশিক বা পূর্ণ শুষ্ক থাকে; এবং
- (ঞ) “সরকার” অর্থ এই প্রজ্ঞাপনের উদ্দেশ্য পূরণকল্পে পানি সম্পদ মন্ত্রণালয়।

৩। অধিদপ্তর প্রতিষ্ঠা।—এই প্রজ্ঞাপন গেজেটে প্রকাশের সাথে সাথে বাংলাদেশ হাওর ও জলাভূমি উন্নয়ন বোর্ড, অধিদপ্তর হিসাবে এমনভাবে বহাল থাকিবে যেন উহা প্রজ্ঞাপনের অধীন প্রতিষ্ঠিত হইয়াছে।

৪। অধিদপ্তরের কার্যালয়।—(১) অধিদপ্তরের প্রধান কার্যালয় ঢাকায় থাকিবে এবং ইহা পানি সম্পদ মন্ত্রণালয়ের সংযুক্ত অধিদপ্তর (Attached Department) হইবে।

(২) অধিদপ্তর, উহার কার্যক্রম সুষ্ঠুভাবে পরিচালনার লক্ষ্যে, সরকারের পূর্বানুমোদনক্রমে দেশের যে কোন স্থানে উহার শাখা কার্যালয় স্থাপন করিতে পারিবে।

৫। অধিদপ্তরের দায়িত্ব ও কার্যাবলী।—অধিদপ্তরের দায়িত্ব ও কার্যাবলী হইবে নিম্নরূপ, যথাঃ—

- (ক) হাওর ও জলাভূমির সার্বিক ও সমন্বিত উন্নয়ন সাধনকল্পে সংশ্লিষ্ট মন্ত্রণালয়/সংস্থা এবং স্থানীয় সরকার প্রতিষ্ঠানসমূহকে সমন্বয় ও সহযোগিতা প্রদান;
- (খ) হাওর ও জলাভূমির সার্বিক উন্নয়নে প্রয়োজনীয় সংখ্যক সমন্বিত মাস্টার প্ল্যান প্রণয়ন;
- (গ) হাওর ও জলাভূমির উন্নয়নের লক্ষ্যে স্থানীয় চাহিদার আলোকে প্রকল্প প্রণয়ন ও বাস্তবায়ন এবং প্রকল্পের আকার ও প্রকৃতি বিবেচনাপূর্বক স্থানীয় সরকার প্রতিষ্ঠান অথবা অন্য কোন সংস্থার মাধ্যমে উহা বাস্তবায়ন;
- (ঘ) হাওর এলাকায় বিভিন্ন মন্ত্রণালয় কর্তৃক বাস্তবায়নাধীন প্রকল্পসমূহ পরিবীক্ষণ ও সমন্বয় এবং সংশ্লিষ্ট বাস্তবায়নকারী সংস্থাকে প্রয়োজনীয় পরামর্শ প্রদান; এবং
- (ঙ) এই প্রজ্ঞাপনের উদ্দেশ্য পূরণকল্পে সরকার কর্তৃক, সময় সময়, নির্ধারিত অন্যান্য দায়িত্ব পালন।

৬। অধিদপ্তরের অধিক্ষেত্র।—হাওর এলাকায় বসবাসরত এলাকাসীসীর জীবনযাত্রার মান উন্নয়নের লক্ষ্যে অধিদপ্তরের অধিক্ষেত্র হইবে নিম্নরূপ, যথাঃ—

- (ক) হাওর ও জলাভূমি এলাকার জন্য উপযোগী অধিক ফলনশীল এবং পরিবেশবান্ধব ধান ও অন্যান্য শস্য চাষ সম্প্রসারণ;
- (খ) মৎস্য সম্পদ উন্নয়ন প্রকল্প গ্রহণ;
- (গ) হাঁস-মুরগী পালন এবং উন্নত জাতের গবাদি পশু পালনে উৎসাহিতকরণ;
- (ঘ) হাওর ও জলাভূমির উপযোগী বনায়ন ও উহার সংরক্ষণের জন্য প্রয়োজনীয় ব্যবস্থা গ্রহণ;
- (ঙ) জলাবদ্ধতা সহনশীল ফলমূলের চাষাবাদ বৃদ্ধিকরণ;
- (চ) পরিবেশের ভারসাম্য সংরক্ষণকল্পে হাওর ও জলাভূমি এলাকার গাছপালা, পশু-পাখি, জলজ ও বন্য প্রাণী সংরক্ষণ;
- (ছ) ক্ষুদ্র ও কুটির শিল্পের সম্প্রসারণের উপযোগী ও সহায়ক ব্যবস্থা গ্রহণ;
- (জ) হাওর ও জলাভূমি এলাকার উপযোগী যোগাযোগ ব্যবস্থার উন্নয়নে সহায়ক ব্যবস্থা গ্রহণ;
- (ঝ) সেচকার্যে হাওর ও জলাভূমির পানির পরিকল্পিত ও সুষ্ঠু ব্যবহার নিশ্চিতকরণ;
- (ঞ) বন্যায় ফসলের ক্ষতি রোধকল্পে প্রয়োজনীয় পদক্ষেপ গ্রহণ;
- (ট) বিভিন্ন পেশাজীবীদের সমবায় ভিত্তিক প্রকল্প গ্রহণে উৎসাহ প্রদান;
- (ঠ) অবকাঠামো উন্নয়নমূলক প্রকল্প প্রণয়ন ও উহার বাস্তবায়ন;
- (ড) সংশ্লিষ্ট এলাকায় বসবাসরতদের জন্য শিক্ষা ও স্বাস্থ্য সেবার উন্নয়ন ও সম্প্রসারণ; এবং
- (ঢ) সংশ্লিষ্ট এলাকার জলাবদ্ধতা ও ঢেউজনিত ভূমিক্ষয় রোধকল্পে প্রয়োজনীয় পদক্ষেপ গ্রহণ।

৭। উপদেষ্টা পরিষদ।—(১) অধিদপ্তরকে দিকনির্দেশনা প্রদানের লক্ষ্যে একটি উপদেষ্টা পরিষদ থাকিবে।

(২) উপদেষ্টা পরিষদ নিম্নবর্ণিত সদস্য সমন্বয়ে গঠিত হইবে, যথা ঃ—

- (ক) মাননীয় প্রধানমন্ত্রী, যিনি উপদেষ্টা পরিষদের চেয়ারপারসন নামে অভিহিত হইবেন;
- (খ) অর্থ মন্ত্রণালয়ের দায়িত্বে নিয়োজিত মাননীয় মন্ত্রী;
- (গ) পানি সম্পদ মন্ত্রণালয়ের দায়িত্বে নিয়োজিত মাননীয় মন্ত্রী, যিনি উপদেষ্টা পরিষদের কো-চেয়ারপারসনও হইবেন;
- (ঘ) স্থানীয় সরকার, পল্লী উন্নয়ন ও সমবায় মন্ত্রণালয়ের দায়িত্বে নিয়োজিত মাননীয় মন্ত্রী;

- (ঙ) সড়ক পরিবহন ও সেতু মন্ত্রণালয়ের দায়িত্বে নিয়োজিত মাননীয় মন্ত্রী;
- (চ) পরিবেশ ও বন মন্ত্রণালয়ের দায়িত্বে নিয়োজিত মাননীয় মন্ত্রী;
- (ছ) পরিকল্পনা মন্ত্রণালয়ের দায়িত্বে নিয়োজিত মাননীয় মন্ত্রী;
- (জ) কৃষি মন্ত্রণালয়ের দায়িত্বে নিয়োজিত মাননীয় মন্ত্রী;
- (ঝ) মৎস্য ও প্রাণিসম্পদ মন্ত্রণালয়ের দায়িত্বে নিয়োজিত মাননীয় মন্ত্রী;
- (ঞ) ভূমি মন্ত্রণালয়ের দায়িত্বে নিয়োজিত মাননীয় মন্ত্রী;
- (ট) বিদ্যুৎ, জ্বালানী ও খনিজ সম্পদ মন্ত্রণালয়ের দায়িত্বে নিয়োজিত মাননীয় মন্ত্রী;
- (ঠ) নৌ-পরিবহন মন্ত্রণালয়ের দায়িত্বে নিয়োজিত মাননীয় মন্ত্রী;
- (ড) সরকার কর্তৃক মনোনীত সংশ্লিষ্ট হাওর এলাকার ৩ (তিন) জন মাননীয় সংসদ সদস্য;
- (ঢ) সরকার কর্তৃক মনোনীত ২ (দুই) জন পানি সম্পদ বিশেষজ্ঞ;
- (ণ) সরকার কর্তৃক মনোনীত ২ (দুই) জন মৎস্য বিশেষজ্ঞ;
- (ত) সরকার কর্তৃক মনোনীত ২ (দুই) জন পরিবেশ বিশেষজ্ঞ;
- (থ) সচিব, পানি সম্পদ মন্ত্রণালয় সদস্য-সচিব হইবেন।
- (৩) উপদেষ্টা পরিষদ বিশেষ প্রয়োজনে বিশেষ বিষয়ে অভিজ্ঞ ব্যক্তিকে সদস্য হিসাবে কো-অপ্ট করিতে পারিবে।
- (৪) উপদেষ্টা পরিষদ অধিদপ্তরকে প্রয়োজনীয় সকল বিষয়ে দিক্ নির্দেশনা প্রদান করিবে।
- (৫) মহাপরিচালক, বাংলাদেশ হাওর ও জলাভূমি উন্নয়ন অধিদপ্তর উপদেষ্টা কমিটিকে প্রয়োজনীয় সহায়তা প্রদান করিবে।
- ৮। উপদেষ্টা পরিষদের সভা —(১) এই ধারার বিধানাবলী সাপেক্ষে, উপদেষ্টা পরিষদ উহার সভার কার্যপদ্ধতি নির্ধারণ করিতে পারিবে।
- (২) উপদেষ্টা পরিষদের সভা চেয়ারপারসন কর্তৃক নির্ধারিত স্থান ও সময়ে অনুষ্ঠিত হইবে :
- তবে শর্ত থাকে যে, প্রতি ৬ (ছয়) মাসে উপদেষ্টা পরিষদের অনূন্য একটি সভা অনুষ্ঠিত হইতে হইবে।
- (৩) উপদেষ্টা পরিষদের সকল সভায় চেয়ারপারসন সভাপতিত্ব করিবেন এবং তাঁহার অনুপস্থিতিতে কো-চেয়ারপারসন বা চেয়ারপারসন কর্তৃক ক্ষমতাপ্রাপ্ত কোন সদস্য উক্ত সভায় সভাপতিত্ব করিবেন।
- (৪) উপদেষ্টা পরিষদ উহার সভায় কোন আলোচ্য বিষয় সংশ্লিষ্ট কোন প্রতিষ্ঠানের প্রতিনিধি বা বিশেষ অবদান রাখিতে সক্ষম এইরূপ যে কোন ব্যক্তিকে সভায় অংশগ্রহণের জন্য আমন্ত্রণ জানাইতে পারিবে এবং উক্ত ব্যক্তি সভার আলোচনায় অংশগ্রহণ করিতে পারিবেন।

৯। অধিদপ্তরের প্রশাসন।—(১) এই প্রজ্ঞাপনের উদ্দেশ্য পূরণকল্পে নিম্নবর্ণিত সদস্য সমন্বয়ে অধিদপ্তরের প্রশাসন গঠিত হইবে, যথাঃ—

- (ক) সরকার কর্তৃক নিয়োগকৃত একজন মহাপরিচালক;
- (খ) সরকার কর্তৃক নিয়োগকৃত অন্যান্য ৩ (তিন) জন পরিচালক।

(২) মহাপরিচালক ও পরিচালকগণের চাকুরীর শর্তাবলী সরকার কর্তৃক নির্ধারিত হইবে।

(৩) কোন কারণে মহাপরিচালকের পদ শূন্য হইলে কিংবা ছুটি, অসুস্থতা বা অন্য কোন কারণে দায়িত্ব পালনে অসমর্থ হইলে মহাপরিচালক দায়িত্ব গ্রহণ না করা পর্যন্ত সরকারের সিদ্ধান্তক্রমে একজন পরিচালক উক্ত পদের দায়িত্ব পালন করিবেন।

১০। প্রধান নির্বাহী।—মহাপরিচালক অধিদপ্তরের প্রধান নির্বাহী হইবেন এবং তিনি অধিদপ্তরের আর্থিক ও প্রশাসনিক কার্যাবলী পরিচালনাসহ অধিদপ্তরের সার্বিক তত্ত্বাবধান, নিয়ন্ত্রণ, উন্নয়ন কার্যক্রম ও প্রকল্পসমূহ বাস্তবায়ন, পরিবীক্ষণ ও মূল্যায়নের জন্য দায়ী থাকিবেন।

১১। পরামর্শক সেবা গ্রহণ।—অধিদপ্তর, উহার বিশেষ ধরনের কারিগরী কাজ সম্পাদনের নিমিত্ত সংশ্লিষ্ট কাজে অভিজ্ঞতা, দক্ষতা এবং সুনাম রহিয়াছে এমন কোন ব্যক্তি বা প্রতিষ্ঠানের নিকট হইতে পরামর্শক সেবা গ্রহণ করিতে পারিবে।

১২। কমিটি গঠন।—উপদেষ্টা পরিষদ, উহার কার্যাবলী দক্ষতার সহিত সম্পাদনে সহায়তা করিবার জন্য, প্রয়োজনবোধে, সংশ্লিষ্ট বিষয়ে অভিজ্ঞ ব্যক্তিবর্গের সমন্বয়ে এক বা একাধিক কমিটি গঠন করিতে পারিবে এবং উক্ত কমিটি বা কমিটিসমূহের সদস্য সংখ্যা, দায়িত্ব, কর্মপরিধি এবং কার্যধারা নির্ধারণ করিতে পারিবে।

১৩। সম্মানী।—উপদেষ্টা পরিষদের সভায় অংশগ্রহণকারী সদস্যগণ বা এই প্রজ্ঞাপনের অধীন গঠিত কোন কমিটির সদস্য সরকার কর্তৃক নির্ধারিত পদ্ধতিতে ও হারে অধিদপ্তরের তহবিল হইতে সম্মানী প্রাপ্য হইবেন।

১৪। অধিদপ্তরের তহবিল।—(১) এই প্রজ্ঞাপনের উদ্দেশ্য পূরণকল্পে ‘বাংলাদেশ হাওর ও জলাভূমি উন্নয়ন অধিদপ্তর তহবিল’ নামে অধিদপ্তরের একটি তহবিল থাকিবে এবং উক্ত তহবিলে নিম্নবর্ণিত উৎসসমূহ হইতে প্রাপ্ত অর্থ জমা হইবে, যথাঃ—

- (ক) বার্ষিক উন্নয়ন কর্মসূচীতে অধিদপ্তর কর্তৃক গৃহীতব্য প্রকল্পের জন্য প্রয়োজনীয় বরাদ্দ;
- (খ) সরকার কর্তৃক প্রদত্ত অনুদান;
- (গ) সরকারের পূর্বানুমোদনক্রমে, কোন বিদেশী সরকার, সংস্থা বা আন্তর্জাতিক সংস্থা হইতে প্রাপ্ত অনুদান বা ঋণ;
- (ঘ) কোন স্থানীয় কর্তৃপক্ষ কর্তৃক প্রদত্ত অনুদান; এবং
- (ঙ) অন্য কোন বৈধ উৎস হইতে প্রাপ্ত অর্থ।

(২) উপ-ধারা (১) এর অধীন গঠিত তহবিলে জমাকৃত অর্থ কোন তফসিলি ব্যাংকে জমা রাখিতে হইবে এবং সরকারের প্রচলিত বিধি-বিধান দ্বারা নির্ধারিত পদ্ধতিতে তহবিল হইতে উক্ত অর্থ উত্তোলন ও ব্যয় করা যাইবে।

(৩) তহবিল হইতে অধিদপ্তরের প্রয়োজনীয় ব্যয় নির্বাহ করা যাইবে :

তবে শর্ত থাকে যে, অধিদপ্তরের উক্ত ব্যয় নির্বাহের ক্ষেত্রে প্রচলিত বিধি-বিধান অনুসরণ করিতে হইবে।

ব্যাখ্যা।—‘তফসিলি ব্যাংক’ বলিতে Bangladesh Bank Order, 1972 (P.O.No. 127 of 1972) এ সংজ্ঞায়িত ‘Scheduled Bank’।

১৫। বাজেট।—অধিদপ্তর, প্রতি বৎসর সরকার কর্তৃক নির্ধারিত সময়ের মধ্যে, পরবর্তী অর্থ বৎসরের সম্ভাব্য বার্ষিক বাজেট বিবরণী সরকারের নিকট পেশ করিবে এবং উহাতে উক্ত অর্থ বৎসরে সরকারের নিকট হইতে অধিদপ্তরের কি পরিমাণ অর্থের প্রয়োজন হইবে উহার উল্লেখ থাকিবে।

১৬। প্রকল্প অনুমোদন ও বাস্তবায়ন।—অধিদপ্তরের আওতাভুক্ত এলাকায় প্রকল্প অনুমোদন ও বাস্তবায়নের জন্য অধিদপ্তরের অনুমোদনের প্রয়োজন হইবে।

১৭। হিসাবরক্ষণ ও নিরীক্ষা।—(১) অধিদপ্তর, যথাযথভাবে উহার হিসাবরক্ষণ এবং বার্ষিক বিবরণী প্রস্তুত করিবে।

(২) বাংলাদেশের মহা হিসাব-নিরীক্ষক ও নিয়ন্ত্রক প্রতি বৎসর অধিদপ্তরের হিসাব নিরীক্ষা করিবেন এবং নিরীক্ষা প্রতিবেদনের প্রয়োজনীয় সংখ্যক অনুলিপি সরকার ও অধিদপ্তরের নিকট পেশ করিবেন।

(৩) উপ-বিধি (২) এ উল্লিখিত নিরীক্ষা প্রতিবেদনের উপর কোন আপত্তি উত্থাপিত হইলে উহা নিষ্পত্তির জন্য অধিদপ্তর অবিলম্বে যথাযথ ব্যবস্থা গ্রহণ করিবে।

১৮। অধিদপ্তরের কর্মকর্তা ও কর্মচারী।—অধিদপ্তরের কার্যাবলী সুষ্ঠুভাবে ও দক্ষতার সহিত সম্পাদনের উদ্দেশ্যে অধিদপ্তর, সরকারের পূর্বানুমোদনক্রমে, প্রয়োজনীয় সংখ্যক কর্মকর্তা ও কর্মচারী নিয়োগ করিতে পারিবে এবং তাহাদের চাকুরীর শর্তাবলী ও সুবিধাদি সরকার কর্তৃক নির্ধারিত হইবে।

১৯। রহিতকরণ ও হেফাজত।—(১) এই প্রজ্ঞাপন কার্যকর হইবার সংগে সংগে ২৭ ভাদ্র ১৪০৭ বঙ্গাব্দ মোতাবেক ১১ সেপ্টেম্বর ২০০০ খ্রিস্টাব্দ তারিখে পাসম-উঃ৫/বিবিধ-১৯/২০০০/৩৮৩ নং স্মারকমূলে জারীকৃত রিজলিউশন রহিত হইবে।

(২) উপ-বিধি (১) এর অধীন উক্তরূপ রহিতকরণ সত্ত্বেও, উক্ত রিজলিউশন এর অধীন প্রতিষ্ঠিত বাংলাদেশ হাওর ও জলাভূমি বোর্ড এর—

(ক) সকল সম্পদ, ক্ষমতা, কর্তৃত্ব, সুবিধা এবং স্থাবর ও অস্থাবর সম্পত্তি, নগদ ও ব্যাংকে গচ্ছিত অর্থ, প্রকল্প এবং অন্য সকল প্রকার দাবি ও অধিকার অধিদপ্তরের সম্পদ, ক্ষমতা, কর্তৃত্ব, সুবিধা, সম্পত্তি, অর্থ, প্রকল্প এবং দাবি অধিকার হিসাবে গণ্য হইবে;

- (খ) সকল ঋণ ও দায়-দায়িত্ব এবং উহার দ্বারা বা উহার পক্ষে বা উহার সহিত সম্পাদিত সকল চুক্তি যথাক্রমে অধিদপ্তরের ঋণ ও দায়-দায়িত্ব এবং উহার দ্বারা বা উহার পক্ষে বা উহার সহিত সম্পাদিত চুক্তি বলিয়া গণ্য হইবে;
- (গ) গৃহীত কার্যধারা বা সূচিত যে কোন কার্যক্রম অনিষ্পন্ন থাকিলে উহা এমনভাবে নিষ্পন্ন হইবে যেন উহা এই রিজিলিউশনের অধীন অধিদপ্তর কর্তৃক গৃহীত বা সূচিত হইয়াছে;
- (ঘ) বিদ্যমান কমিটি, কারিগরী কমিটি অথবা অন্যান্য কমিটি বা উপ-কমিটি, যদি থাকে, কার্যক্রম, বিদ্যমান মেয়াদ অবসানের পূর্বে বিলুপ্ত করা না হইলে, এমনভাবে অব্যাহত থাকিবে যেন উক্ত কমিটি বা কারিগরী কমিটি এই রিজিলিউশনের অধীন গঠিত হইয়াছে; এবং
- (ঙ) কর্মকর্তা ও কর্মচারিগণ এই প্রজ্ঞাপন জারির অব্যবহিত পূর্বে যে শর্তাধীনে চাকুরীতে নিয়োজিত ছিলেন, এই প্রজ্ঞাপনের বিধান অনুযায়ী পরিবর্তিত না হওয়া পর্যন্ত, সেই একই শর্তে অধিদপ্তরের চাকুরীতে নিয়োজিত থাকিবেন এবং পূর্বের নিয়মে বেতন, ভাতা ও অন্যান্য সুবিধাদি প্রাপ্ত হইবেন।

রাষ্ট্রপতির আদেশক্রমে

ড. জাফর আহমেদ খান
সচিব।